

* Pedagogi zentrorako oinarriak finkatu ditu Ikas-ek ezohiko biltzar nagusian

Lehendakari berria otsailean izendatuko dute administrazio kontseilua osatuta

Ikas elkarteak euskal irakaskuntzaren beharrei erantzuteko pedagogi zentrorako oinarriak finkatu zituen atzo, Uztaritzen egin zuen ezohiko biltzar nagusian. Gisa horretan, euskaraz egindako irakaskuntzaren aktore ezberdinak bildu ditu «denon artean euskararen aldeko elkarlana» bultzatzeko.

Hur Gorostiaga / Uztaritze

1959 URTETIK Ikasek «euskararen eta euskarazko irakaskuntza eskolako sare guztietan helburutzat duten edozein ekimen eragitea, bultzatzea eta laguntzea, eskuz eta bihotzez» izan du xedeko. Atzoko biltzarren ostean, eta egungo beharrei erantzunik, Ikas euskal pedagogia zerbitzua bilakatu da eta bere araudia horren arabera aldatu du.

1959an Baionan 200 irakasle bildu ziren bilkura sortzaile hartarik atzoko biltzar nagusira, Ipar Euskal Herriak eta batez ere bertan egiten den euskararen irakaskuntzak hainbat aldaketa bizi izan du. Azken urteotan euskararen irakaskuntza arlo publikoan, pribatuan, ikastoletan eta helduentzako alfabetatze antolaketetan oinarritu da. Ikasek, pedagogia zentro bilakatuz, azken bi urteotan eraman eztabaidaren gauzatzea lortu du bere baitan euskarazko irakaskuntzari loturik diren irakasle, guraso, hezkuntza eta kultur arloko eta zuzenbidezko bazkideak elkarrekin lanean ezarri.

Euskara irakastetik euskaraz irakastera egin den pausoak «de-



Irakaskuntza munduko ordezkari ugari bildu zen atzoko batzarrean.

HUR GOROSTIAGA

nen arteko elkarlaguntza» behar duela azaldu zuen Danielle Albisu Ikaseko lehendakariak biltzar nagusian sortu zen eztabaldarekin bat eginik. Pedagogia zentroak mota guztietako dokumental mailailegatuak ditu, pedagogia sialeko animazioak eta ikerkuntzak landuko ditu, eta dokumentu berriak sortu eta hedatuko ditu. Erabiltzaile nagusiak irakasleak eta kultura saileko langile eta arduradunak izanen dira, baina publiko zabalari ere irekirik izanen da. Horretaz arduratuko diren bi langileren sustenguz, batzorde zientifiko eta pedagogikoa egonen da, CRDP Akitania Eskualdeko lankidetz

teknikoak eginen dituen dokumentuen mailegutza eta sor daitzekeen hitzarmenen bitartez.

Atzoko biltzar nagusian Bernard Auroy Uztaritzeko auzapezak egin zuen ongietorria, alboan Danielle Albisu lehendakaria eta Erramun Baxok zituela. Ehunetik gora kide bildu zituen aretoan, Max Brisson Eskualdeko hautetsiak Jacques Valade lehendakariaren sustengua adierazi zien, ondotik «euskara garatzeko beharrezkoak diren tresnak sortu behar direla» gaineratzeko, «egun aita eta amanengandik seme-alabenganako bidea aski ez delako». Jean Jacques Lasserrek ere, ildo beretik, zentro pe-

dagogikoa martxan ezartzeko egindako ahaleginak azpimarratu zituen, departamenduaren sustengu osoa duela gaineratzeko.

Ramuntxo Camblong Garapen Kontseiluko lehendakaria ere bertan izan zen, pedagogia zerbitzua Garapen Kontseiluaren partaidetza garrantzitsuaz muntaturiko lehen emaitza delako. X

Aldaketak

IKAS-EK euskararen eta euskarazko erakaskuntza hedatzeko laguntza du helburu. bai eta euskal ondarea eta kulturaren ezagutza eskolatan bultzatzea ere. Horretarako 20 pertsonaz osaturiko administrazio kontseilua izatea erabaki zuten atzoko biltzarrean; hor batuko dira lau irakaskuntza sareetako irakasleak, hiru eskola sareetako guraso elkarteak, hezkuntza eta kultura alorretako ordezkariak, eta zuzenbidezko bazkideak. Horietatik hamalau hautatu zituzten atzo.

Euskararen eta euskarazko erakaskuntzaren inguruan dabiltzan elkartearen ordezkariak bildu nahi ditu bere baitan Ikas-eko administrazio kontseiluak.

Irakasleei dagokienez Irene Itursarri eta Guy Kopentzi ariko dira AEKren izenean. Jeanine Urruti eta Prudente Sudupe Seaskaren ordezkariak. Elena Touyrou eta Peio Claverie eskola pribatuko irakasle gisa, eta azkenik eskola publikoko irakasle diren Xabier Errotabere eta Michel Jorajuria.

Kultura eta hezkuntza arloan berriz Ur Apalategi (IEHIE), Piarres Aintziart (Maiatz) eta Manex Kurutzaren Gurasoen taldean pribatuko Anne Marie Indaburu eta Bernard Eiherrabide, eta Seaskako Estebe Eiherrabide izango dira ordezkariak.

Eskola publikoko gurasoak aukeratzeko hiru asteko epea finkatu zuten, eta horrekin batera zuzenbidezko bazkideen taldea finkatu ondoren. Ikaseko lehendakari berria otsailean izendatuko dute. Atzo abiatutako prozesuari amaiera emango dio era horretan Ikas-ek. X

Donibane-Ziburuko ikastolaren geroaz ez du oraino erabaki Herriko Etxeak

■ Baionako ama ikastola eta bigarren maila berria Rousseau ikastetxean

Hur Gorostiaga / Donibane-Lohizune

DONIBANE-ZIBURUKO ikastolaren egoitza berriei buruzko eztabaida atzeratu egin zuen, joan den ostiraleko udal kontseiluan, Michel Alliot-Marie Donibane-Lohizuneko auzapezak.

Donibane-Ziburuko ikastolak 160 ikasle ditu egun, ama ikastolatik lehen mailara. 1990 urtean zuten etxe zaharra halabeharrez utzi eta Paul Badiola auzapezak, egun duen 14.000 metro karratu dituen behin behineko lurraldean ezarri zuen ikastola.

Hauteskunde kanpaina hitzeman gisan, Alliot-Marie auzapeza ikastolari eraikuntza berriak emateko prest azaldu da, eta horretarako ikerketa komi-

sioa ezarri du martxan. Komisio honek, 3.400 metroko lurralde proposatu dio ikastolari. Ikastolako arduradunek aho batez ukatu dute lurralde horretan hainbertze haur sartzerik ez dagoelako.

Hala ere udal komisioak aitzina egin eta ostiraleko udal kontseiluan Herriko Etxeak lurralde hori ikastolarentzat erosteko erabakia hartu beharra zuen. Ikastolako arduradunak horren jakinean izanki, gutun bana bidali zieten ostiral goizean Donibane-ko kontseilariari gisa horretako lurraldean ikastola kokatzetik onartuko ez zutela erranik. Azkenean, lurraren erosketa eguneko erabakigaitatik kendu zuen Michel Alliot-Marie Donibane-Ziburuko auzapezak.

Rousseau proiektua aitzina

Baionan, aldiz, gauzak bertze era batera gertatu dira. Seaskako arduradunak Jean Grenet auzapezarekin bildu dira aste honetan, eta honek Baionako ama-ikastola eta lehen maila, eta Seaskako bigarren maila Jean-Jacques Rousseau kokatzen ahalko direla hitzeman die, lehengo errana zuen gisara. Lamasoure Distrituko lehendakaria ados dela azaldu du Grenetek.

Hala ere oraino dena finkatzeko dago, paperean idatziz lotu eta heldu den irailean sarrera hant egiteko lehen urratsak finkatu behar dituzte otsailean. Oihana ikastolako ama-ikastola eta lehen mailako ikasleez gain, Kanboko lizeoa bertaratuko litzateke, kolegioa Kanbon gelditzeko. X

OTSAILAK

24



HERRI BATASUNA